

# Transkript sa konferencije za medije zamjenika visokog predstavnika i predstavnika pomladaka političkih partija na kojoj je predstavljana platforma omladinske politike

Viši zamjenik visokog predstavnika, Martin Ney

Dame i gospodo iz medija, zahvaljujem vam se što ste danas došli i izvinjavam se zbog zakašnjenja. Ovo je veoma značajna događaj jer ćemo vam danas predstaviti platformu omladinske politike.

Ovi mladi ljudi koji stoje pored mene ovdje su kao mladi političari zajedno sa svojim kolegama iz 14 različitih političkih stranaka od jula prošle godine radili na izradi ovog dokumenta. Nije bitno iz kojih partija ovi mladi ljudi dolaze jer je dogovoreno da će ovo biti nestranačka aktivnost. Oni su ovdje kao predstavnici mladog stanovništva ove zemlje koji žele promijene u vezi ključnih pitanja mladih ljudi u Bosni i Hercegovini. Dokazali su da mladi političari iz različitih političkih stranaka mogu raditi zajedno. I to je njihovo dostignuće. Ured visokog predstavnika nije autor ovog dokumenta, već samo inicijator i fasilitator ovog procesa. U platformi su identifikovane četiri prioritetne oblasti, odnosno pitanja koja se trebaju što prije riješiti u ovoj državi:

- Zapošljavanje;
- Obrazovanje;
- Zdravstvo i socijalna zaštita; i
- Institucionalna pitanja.

Dozvolite mi da vam ukratko predstavim ključna pitanja iz ovih oblasti:

**Zapošljavanje** – zahtjev za bolje mogućnosti zapošljavanja mladih, zabranu diskriminacije pri zapošljavanju mladih ljudi – znači jednake mogućnosti pri zapošljavanju, zahtjev za uspostavljanje pripravnčkih programa, te beneficije i povlaštene kredite za mlade.

**Obrazovanje** – prioritet je Zakon o visokom obrazovanju, te primjena Bolonjske deklaracije, stvaranje nacionalne strategije za visoko obrazovanje, usklađivanje nastavnih planova i programa u osnovnim i srednjim školama, osnivanje istraživačkih fondova i tako dalje.

**Zdravstvo i socijalna zaštita** – zahtjev da se imenuje državni koordinator za sprječavanje zloupotrebe droga, da se domovima mladih vrati njihova prijašnja funkcija, i usvajanje zakona o sportu.

**Institucionalna pitanja** – zahtijeva se da se na svim nivoima vlasti uspostave posebna tijela koja bi se bavila pitanjima mladih ljudi.

Sada ću dati riječ Srđanu Todoroviću koji će vam predstaviti zahtjeve koji se odnose na zapošljavanje, a potom će Nina Malović predstaviti zahtjeve koji se odnose na obrazovanje, i na kraju Adnan Bogunić će vas upoznati sa zahtjevima koji se tiču zdravstvene i socijalne zaštite kao i sa institucionalnim zahtjevima.

Prvo Srđan Todorović.

**Srđan Todorović**

Dobar dan svima. Zahvaljujem svima iz medija koji prate ovaj događaj i što su nam dali mogućnost da predstavimo danas naš rad.

Naime, mi smo napravili jednu platformu za izradu omladinske politike u kojoj smo smatrali da je zapošljavanje jedan od prioritetnih faktora koji utiče na ovakvo stanje mladih ljudi i jedan od glavnih faktora zašto mladi ljudi žele da napuste Bosnu i Hercegovinu. Također smatram da je zapošljavanje jedan od najsnažnijih faktora koji utiče na ostale negativne pojave među mladim ljudima kao što su narkomanija, kriminal i tako dalje. Mi smatramo nemogućnost zapošljavanja mladih ljudi dakle, kao jedan od generatora svih ostalih negativnih problema u našem društvu. Zato smo u ovoj platformi izradili neke osnovne smjernice kako mi mislimo da treba pristupiti rješavanju problema mladih ljudi, pa i zapošljavanja.

Mislimo da je prije svega potrebno usvojiti zakon o pripravničkom stažu i zapošljavanju mladih ljudi. Imamo jedan pozitivan primjer, u Savezu ministara je otprilike nešto tako izregulisano. Mislimo da to treba prenijeti na ostale državne institucije i nivoe vlasti gdje bi se stvorila jedna obaveza državnih institucija da zapošljavaju prije svega pripravnike a onda i mlade ljude kroz konkursne procedure.

Mislimo da je vrlo značajno utvrditi beneficije za one poslodavce, odnosno one kompanije koje zapošljavaju mlade ljude. Prije svega mislimo da to treba izregulisati kroz obavezu, također o zapošljavanju, istih tih poslodavaca – da imaju obavezu da zapošljavaju mlade ljude, da ne bi se dešavala jedna stvar koju imamo recimo u Republici Srpskoj, da je Zavod za zapošljavanje davao određene nadoknade poslodavcima koji zapošljavaju mlade ljude ali bez obaveze zapošljavanja mladih ljudi. I onda su poslodavci zapošljavali mlade na mjesec dana i uzimali tu nadoknadu i tako nastavili, ustvari ostvarivali korist na osnovu tih beneficija.

Mislimo da Agencije za državnu službu trebaju definisati kriterije koje će se poštovati prilikom procedure zapošljavanja zato što smatramo da su uglavnom u državnim institucijama na sceni naštimani uslovi konkursa koji u startu eliminišu mlade ljude sa znači, potrebnim godinama radnog

staža i onda se za mlade ljude stvara otprilike jedan krug – jer oni nemaju radni staž potreban za zaposlenje, a normalno ne mogu da steknu radni staž jer im nije dana mogućnost da se zaposle. Zbog toga smatram da Agencije treba da stvore jedan standardan kriterijem koji mora biti opće prihvaćen u konkursnim procedurama. I mislimo da je na svim nivoima vlasti moguće osnovati i da trebaju osnovati fondovi za davanje povlašćenih zajmova mladim ljudima u cilju samozapošljavanja.

To su otprilike neke osnovne smjernice iz naše platforme na problemu rješavanja nezaposlenosti. U drugom dijelu platforme koji ćemo mi kasnije da ponudimo postoje neki operativni pravci rješavanja ovih problema.

Također želim ovom prilikom da uputim jednu kritiku Savjetu ministara i predsjedavajućem kojeg smo već dva mjeseca pokušavali kontaktirati da organizujemo jedan radni sastanak gdje bi mi pokušali da mu prezentujemo ovu platformu. Poslije dva mjeseca, normalno, nismo uspjeli da to organizujemo. Mislim da je to dovoljan dokaz jednog pasivnog odnosa i žalosnog odnosa ove države prema mladim ljudima. I mislim da sama činjenica da su ovaj sastanak i izrada ovog dokumenta inicirani i sprovedeni pod pokroviteljstvom Kancelarije visokog predstavnika dovoljno sramotna za institucije naše države i dovoljno svjedoči o samom odnosu ove države prema mladim ljudima. Hvala.

## **Viši zamjenik visokog predstavnika, Martin Ney**

Trebamo to pozitivno gledati – platforma je uspostavljena i proces se odvija među samim političarima. Dakle, da poslušamo šta će nam Nina Malović reći.

**Nina Malović**

Dobar dan svim prisutnim. Ja ću danas ukratko reći o dijelu platforme koji se tiče obrazovanja.

Najprije želim reći da mi pozdravljamo pripremljeni nacrt Zakona o visokom obrazovanju koji je produkt rada Radne grupe predsjedavajućeg Vijeća ministara. Ali sada moramo apelirati dakle, da se taj zakon što prije usvoji jer mladi su i predugo čekali na zakon o visokom obrazovanju na državnom nivou.

Slijedeća stvar o kojoj smo razgovarali u ovoj platformi, kada smo pripremali platformu, je naravno Bolonjska deklaracija koja je goruća tema u Bosni i Hercegovini u posljednje vrijeme. Pošto je Bolonjski proces jako opširan ja ću danas istaknuti smo jednu od njegovih praktičnih implikacija, a to je horizontalna i vertikalna mobilnost studenata. Pa bi ovom prilikom rekla jedan svoj lični primjer te horizontalne mobilnosti, odnosno nemobilnosti – kada sam se sa Univerziteta Džemal Bijedić u Mostaru prepisivala na Filozofski fakultet u Sarajevu na isti odsjek, dakle radilo se o istim predmetima i čak o istim profesorima koji rade i u Sarajevu i u Mostaru, ali mi nijedan ispit nije bio priznat u Sarajevu. Smatram da je to jako degradirajuće i unazađujući za studente. I mislim da ima jako puno mladih ljudi koji bi mogli ispričati ovakvu priču.

Da se vratim na platformu, zadnja stvar o kojoj smo raspravljali je i potreba za osnivanjem agencija za kvalitetan nastavni proces i nastavni plan i program, pa u sklopu tih agencija i uspoređivanje uspjeha studenata u Bosni i Hercegovini sa uspjesima studenata na prestižnim evropskim fakultetima – da vidimo gdje to naši studenti stoje u tom cijelom procesu obrazovanja.

I posljednja stvar koju bi danas ovdje istakla, pošto nemam mnogo vremena, je također i to da smo mi osjetili potrebu za pravljenjem korektne politike prilikom upisivanja na visoko obrazovne institucije, koje bi bile i balansirane u skladu sa potražnjom na tržištu, dakle potražnjom radnika – da se ne bi

desilo da iz jedne struke imamo jako puno eksperata koji ne mogu da nađu posao, a u nekim drugim poljima nijednog mladog eksperta.

To bi bilo u kratkim crtama, a u kopijama platforme koje ćete dobiti na kraju konferencije možete vidjeti još neke naše preporuke u vezi problematike mladih. Hvala.

## **Adnan Bogunić**

Dobar dan. Ja vas sviju pozdravljam. Ja bih kada je u pitanju dio naše platforme omladinske politike koji se odnosi na socijalna pitanja i institucionalne zahtjeve želio da izdvojim otprilike tri najvažnija prioriteta.

Kao prvo, mi smatramo da je vrlo važno da se u Bosni i Hercegovini napokon riješi status Domova mladi. Dakle, Domovi mladih sasvim jasno trebaju da predstavljaju prostor, dakle jedno prirodno mjesto na kojima se mladi ljudi mogu okupljati, organizirati, družiti, učiti i tako dalje – u principu ispoljavati svoje kulturne, društvene i druge potrebe. Vama je dobro poznato da je funkcija Domova mladih kako u ratnom tako i u poslije ratnom periodu bitno izmijenjena. I u tom smislu mi insistiramo, mi apelujemo, molimo da se Domovi mladih što prije moguće, vrate onima kojima su najviše potrebni, a to su upravo mladi ljudi.

Drugi prioritet koji bi izdvojio za ovu priliku jeste slijedeće: Mi smatramo da je vrlo važno da se u Bosni i Hercegovini afirmiše participacija mladih ljudi u institucionalnim strukturama na svim nivoima vlasti u Bosni i Hercegovini kako bi mladi ljudi bili u prilici da aktivno sudjeluju u radu organa vlasti, da koordiniraju aktivnosti mladih, da praktično učestvuju u njihovom radu na taj način i da adekvatno zadovoljavaju svoje interese i potrebe. Sasvim je jasno na primjer, da bilo kakva rješenja u oblasti obrazovne politike ne mogu se donositi, ne mogu se kreirati bez aktivne

participacije mladih, bez njihovog praktičnog sudjelovanja u tim procesima.

I treće što bi bilo korisno izdvojiti za ovu priliku jeste to da mi pozdravljamo konačno osnivanje i rad Komisije za mlade Bosne i Hercegovine, koja u principu treba da predstavlja to centralno tijelo koje će se baviti definiranjem politike prema mladima u Bosni i Hercegovini. Mi dajemo punu i nesebičnu podršku njenom radu. I upravo u tom kontekstu smatramo da rješenja i zahtjevi koji su sadržani u našoj platformi mogu postati dobra osnova za njen rad i dobra osnova za daljnji rad. Nadamo se i iskreno želimo da naša saradnja sa ovom Komisijom u budućnosti bude produktivna, uspješna i korisna. Toliko od mene. Hvala.

## **Viši zamjenik visokog predstavnika, Martin Ney**

Dame i gospodo, dozvolite mi da samo dodam još dvije stvari. Platforma omladinske politike je realistična. To je prva stvar. Vidjeli ste da je platforma provediva. Sve što je navedeno u platformi su stvari koje omladina u svim državama treba imati na raspolaganju, to su zahtjevi koje bi trebala svaka država ispunjavati.

Druga stvar je – Ured visokog predstavnika kao fasilitator ovog procesa želi da se ovi zahtjevi postanu realnost, a današnja konferencija za medije predstavlja tek prvi korak ka ostvarivanju tog cilja. Ja ću nastaviti pomagati ovim mladim ljudima u nastojanju da se implementira omladinska politika u BiH. Iz ovog razloga želio bi iskoristiti ovu priliku da apelujem na sve odgovorne vlasti u BiH da ozbiljno shvate ovu platformu omladinske politike te da temeljno prouče njen sadržaj. Platforma sadrži prijedloge koji trebaju vidjeti svjetlo dana i biti implementirani.

Također bi želio da pozovem predstavnike nevladinih organizacija da se uključe u proces implementacije ove platforme. Prije nego što pređemo na pitanja želio bi

čestitati ovim mladim ljudima koji su danas ovdje u ime cijele grupe. Čestitam vam!

Da li ima pitanja?

### **Pitanja i odgovori:**

#### **Lejla Redžović, BH TV 1:**

Tehnička je stvar prva – ako vam nije problem da ponovite imena i prezimena ovih mladih ljudi. Druga stvar, pitanje za nekog od njih – šta sad sa platformama, završili ste, izgleda da imate neke konkretne prijedloge, pa šta ćete s njom sada?

#### **Srđan Todorović:**

Mi se nadamo i otprilike imamo viziju nekih daljih pravaca djelovanja. Imamo otprilike neka praktična rješenja koja smo izradili, koja želimo da ponudimo. Mada, opet kažem da se nadam da će ovo predstavljanje biti signal institucijama vlasti. Ja se nadam da će se razrada ove platforme nastaviti u institucijama države Bosne i Hercegovine, kako to i treba da se odvija. I nadam se da će neko ozbiljno da shvati ova naša...

#### **Lejla Redžović, BH TV 1:**

Samo ako nije problem da se opet predstavite. I još jedna stvar, rekli ste da mladi iz 14 političkih stranaka je učestvovala u izradi ove platforme. Zanima me koje su to političke stranke.

#### **Srđan Todorović:**

Kasnije ćete dobiti nacrt platforme i tu su pobrojani svi pomladci političkih partija koji su učestvovali. Ja sam inače Srđan Todorović iz Doboja iz pomlatka Socijalističke partije.

**Viši zamjenik visokog predstavnika, Martin Ney:**



Ako samo mogu dodati još ovo – svi ćete dobiti kopiju platforme omladinske politike i tu su navedene sve političke partije čiji su pomladci učestvovali u izradi ovog dokumenta. Međutim, imena ovih mladih ljudi nisu tu navedena. Imati ćete to napismeno.

**Nina Malović:**

Ja sam Malović Nina. Ne bi govorila iz koje političke partije dolazim jer smo mi ovo zamislili kao jedan projekat mladih, znači da se mi mladi udružimo zajedno a ne da ističemo ili reklamiramo neku od naših stranaka. Hvala.

**Adnan Bogunić:**

Ja sam Adnan Bogunić.

**Viši zamjenik visokog predstavnika, Martin Ney:**

Sada vidim da moj izgovor nije bio sasvim razumljiv. Imate li još pitanja?

**Novinar #2:**

Za vas gospodine Ney. Čuli smo mlade šta misle o odnosu institucija i starijih političara prema mladim. Komentar OHR-a? Kakav je odnos institucija BiH prema mladima, da ga ocijenite?

**Viši zamjenik visokog predstavnika, Martin Ney:**

Ministarstvo za civilna pitanja ima odgovornost da vodi računa o komisiji za mlade. Komisija za mlade je uspostavljena i željeli bismo da počne sa radom što prije moguće. Veoma je važno da Ministarstvo za civilna pitanja također uspostavi odsjek/odjeljenje koje će pružati stručnu pomoć komisiji za mlade. Razgovarao sam sa ministrom Halilovićem o ovom pitanju – o tome da Ministarstvo treba obezbijediti stručnu podršku komisiji za mlade.

Smatram da se ova pitanja mladih ljudi ne trebaju rješavati samo na državnom nivou. Ovo su pitanja koja je potrebno riješiti i na entitetskom nivou, a i na općinskom nivou. A zbog širokog spektra ovih pitanja jasno je da nije dovoljno da se samo jedno ministarstvo bavi pitanjima koja se odnose na mlade ljude. Potrebno je da se čitav niz ministarstava bavi pitanjima mladih ljudi.

Važno je razumjeti da se čitav niz pitanja odnosi na mlade ljude, te da je neophodno da sve ove institucije podržavaju i vode računa o mladim ljudima ove zemlje. Budućnost ove zemlje je u rukama mladih. Ono što je izuzetno ohrabrujuće jeste da su ti mladi ljudi koji dolaze iz 14 različitih političkih stranaka, se sastali i zajedno dogovorili o izradi ove platforme. Oni su se u roku od tri mjeseca zajednički dogovorili o pravima koje bi mladi ljudi trebali imati u ovoj državi.

Smatram da je ovo veličanstven proces i čestitam svima njima. Također smatram da bi stariji političari na svim nivoima vlasti trebali pažljivo pogledati ovaj proces i uvidjeti da su ovo realni zahtjevi. Ako se odgovori na zahtjeve koji su izneseni u ovoj platformi odgovara se na stvarne potrebe mladih ljudi u ovoj državi. Ponovo ističem, mladi političari iz 14 različitih stranaka su uspjeli postići zajednički dogovor. Hvala vam.

### **Novinar #3:**

Meni ovdje nešto nije jasno. Možda vama jeste, ali meni nije. Kazali ste prvo...nemojte me pogrešno shvatiti, dakle ne osuđujem zajedničku politiku mladih da se zajednički bore za svoja prava bez obzira odakle dolaze, i tako dalje. No, da nam neko od njih odgovori s obzirom da dolaze iz većine političkih partija koje participiraju u vlasti ili su na vlasti u Bosni i Hercegovini – da nam konkretno kaže netko od njih šta su oni do sada učinili kao forum mladih, pokret mladih u okviru svoje stranke da se izbore za svoja prava, ako smo sada čuli da

nitko faktički iz vlasti njih ne podržava, odnosno nemaju podršku vlasti? Dakle, izvinite ali meni to nije jasno. Da li to znači da oni služe samo kao paravan tim političkim partijama ili u neke druge svrhe – kada su izbori?

Dakle, konkretno kome će oni ponuditi ovu platformu koju su izradili kad su maločas konstatirali da predsjedavajući Vijeća ministara dva mjeseca nije imao vremena da se sastane s njima? Kome će se platforma uputiti? Kako će se ona dalje realizovati? To je jedan dokument, ali da ne bude samo mrtvo slovo na papiru?

### **Srđan Todorović:**

Pa ovako, mislim da ste vi nažalost jednim dijelom upravu – da mladi ljudi u nekim političkim partijama možda globalno gledajući i nemaju neku snagu u svojim političkim partijama. Ali to je također jedan globalni problem protiv kojeg se mi borimo i pokušavamo na sve moguće načine da nešto učinimo. Ne možemo generalizovati i reći da su u svim političkim partijama i u svim političkim pomladcima – da je jedna ista situacija. Normalno da postoje drastične razlike. Evo u nekim političkim partijama mladi predstavljaju snažniji faktor i mogu da utiču u dobroj mjeri na rad i na ciljeve svoje političke partije. Ali to opet zavisi od mladih.

Tačno je da stariji političari u svim političkim partijama pokušavaju da imaju omladinske organizacije, što ja zovem «reda radi», jer je to omladinsko pitanje i pitanje mladih u Bosni i Hercegovini veoma aktualno zbog činjenice da 70% mladih žele da ode iz Bosne i Hercegovine. I činjenica je da svim domaćim političarima u javnim nastupima su puna usta mladih ljudi. Činjenica je također da oni malo toga čine i da ne shvataju ozbiljno. Možda će čak i ova platforma da se shvati eto kao djeca se igrala pa nešto napisala.

Ali, mi iz 14 pomladaka političkih partija smo se dogovorili i ja u svoje ime mogu da kažem da ću nastojati, a mislim da će i

ostali, da u svojim političkim partijama nastoje da se ovi problemi i ova platforma i ovakav pristup shvate ozbiljno. To je sada individualna stvar kako će tko od nas u svojoj političkoj partiji da uspije da iz svog nekog položaja utiče na politiku partije. Ali mislim da činjenica da smo mi svi zajedno se skupili i napravili ovo treba da predstavlja, da odaje jedan snažan utisak o starijim političarima i bez obzira iz kojih političkih partija – da je ovo nešto ozbiljno i da postoji saglasnost svih nas zajedno. I ustvari svi mi iz pojedinačnih političkih pomladaka dajemo podršku svakom tom mladom čovjeku u svojoj političkoj partiji bez obzira iz koje političke partije on dolazio.

Ono što smo mi uspjeli da uradimo i mislim da je u proceduri – da smo od Parlamentarne skupštine zahtijevali nevezano za ovu platformu izmjenu Izbornog zakona gdje bi se mladi ljudi regulisali otprilike na isti način kako su i žene regulisane Izbornim zakonom, jer smatramo da bi se time popravio položaj mladih ljudi i osnažio njihov uticaj u svojim političkim partijama i time normalno ciljevi te političke partije bi više odražavali ciljeve mladih ljudi.

## **Viši zamjenik visokog predstavnika, Martin Ney:**

Mogu li dodati jedan komentar? Zamolio bi vas da ne tumačite ovo kao strateški potez u izbornoj godini s ciljem pridobivanja glasova. Ovaj proces je započet u julu prošle godine. Sa ozbiljnom izradom ovog dokumenta se počelo u septembru. To je bio dugotrajan proces koji je započet prije dosta vremena. Nema nikakve veze sa izborima.

### **Novinar #4:**

Dobro večer. Pomenut zahtijeva za izmjenu Izbornog zakona – hoćete li vi iz OHR-a njima pomoći da to, da tako kažem u nekoj kraćoj proceduri to prođe, jer bez pritiska nema ništa? To bi bilo sve.

## **Viši zamjenik visokog predstavnika, Martin Ney:**

Kao što sam rekao na početku, Ured visokog predstavnika je fasilitator ovog procesa. Platforma omladinske politike nije upućena Uredu visokog predstavnika, a Ured visokog predstavnika neće jednostavno uzeti stvari u svoje ruke i to sve implementirati na raznim nivoima vlasti. Mi smo samo omogućili ovim mladim ljudima da se okupe i rade zajedno na izradi ove platforme. Na njima je, na mladim političarima u ovoj zemlji da pokrenu ta pitanja u svojim političkim strankama, da pokrenu ta pitanja sa vama – kako bi informirali javnost o svemu tome, a potom je na parlamentarnim skupštinama i svim nivoima vlasti da to sve provedu. Mi ćemo i dalje biti fasilitator u ovom procesu, međutim nećemo uzeti stvari u svoje ruke i preuzeti sve na sebe. To nije funkcija Ureda visokog predstavnika, naročito sada kada su počeli pregovori o Sporazumu o stabilizaciji i pridruživanju.

### **Novinar #4:**

Pitao sam vas hoćete li im pomoći zato što se ova 4 pitanja potežu godinama ovdje i ništa nije promijenjeno. Dakle, ne vidim ništa novo u ovoj platformi u odnosu na dosadašnje aktivnosti mladih. Netko im mora pomoći.

### **Adnan Bogunić:**

Mislim da u odgovoru na vaše pitanje je najbolje da se vratimo na ono što je gospodin Ney spomenuo. A to je da suštinska vrijednost ove platforme je u tome što su se mladi ljudi na jednom mjestu u jednom van političkom procesu okupili i zajedno na jedan vrlo, rekao bih profesionalan način sa jednom maksimalnom akribijom, sa maksimalnim zalaganjem stvorili jedan set zahtijeva, odnosno prioriteta čijem rješavanju bi se trebalo hitno pristupiti, sa prijedlogom rješenja odgovarajućih problema koje oni prepoznaju kao svoje bitne probleme. I u tom smislu, znači sama ta dimenzija je dovoljna kao neki početak. A možete biti sigurni da ćemo nastaviti da

se borimo za implementaciju rješenja.

Ono što je vrlo važno jeste to da je ova platforma koncipirana tako da sadrži određena rješenja čijoj se implementaciji može pristupiti odmah. Znači, uopšte nije potrebno dalje razrađivati neke stvari. Mi smo prepoznali u čemu su problemi i zajedno ćemo nastupiti u da tako kažem, insistiranju, u pritisku najrelevantnije strukture uz podršku omladinskih nevladinih organizacija, uz podršku međunarodnih faktora kako bi se rješenja implementirala. Možete biti sigurni u to.

#### **Novinar #5:**

Dakle, ovo nije prvi put da mi slušamo šta mladi žele, čak su se dogovorili i na kraju od toga nije bilo ništa.

#### **Adnan Bogunić:**

Ja sam uvjeren da će ova platforma predstavljati osnovu rada Komisije. Komisija za mlade koja je formirana na nivou Bosne i Hercegovine će pod našim pritiskom najvjerojatnije, morati uzeti ovu platformu u razmatranje. Mi već imamo određene kontakte po tom pitanju. Ja sam siguran da ova platforma može poslužiti kao dobra osnova za dalji rad. Nadam se da ste zadovoljni. Hvala.

#### **Srđan Todorović:**

Mogu li ja samo kratko da dam odgovor. Mislim da je što je kolega rekao vrlo bitna stvar da su ovo podmlatci gotovo svih političkih partija iz Bosne i Hercegovine koji su se skupili bez ikakvih pritisaka i stvorili jednu platformu iza koje stoje svi. I mislim da je to najsnažnija stvar.

Jedna druga stvar što se tiče vas iz medija, tko će nam pomoći? Ja mislim da nam vi možete dosta pomoći. Onoliko je snažna naša riječ i onoliko snažni ćemo mi biti u javnosti, u svojim političkim partijama koliko nam vi dadnete mjesto u tome svemu. Činjenica je i simptomatično također da i mediji

ne daju dovoljnu težinu mladim ljudima i riječima mladih ljudi i nekom njihovom radu. Uglavnom se daje težina i daje akcent starijim političarima i šta su to oni rekli i kako to oni misle. Mislim da vi tu nosite također veliku odgovornost jer onoliko koliko nam vi pomognete toliko ćemo mi uspjeti. Hvala.

**Nenad Glušica, NTV 99:**

Gospodine zamjeniče visokog predstavnika, sve ono što je danas rečeno zaista zvuči vrlo lijepo i pomalo bajkovito. Međutim, u Bosni i Hercegovini postoji uvriježeno mišljenje da će mladi dobiti svoju šansu onda kada to stari dozvole. Vaš komentar?

**Viši zamjenik visokog predstavnika, Martin Ney:**

Mislim da Bosna i Hercegovina vrlo često misli da je posebno mjesto u svijetu. A činjenica je da se dešavaju lične stvari i u drugim zemljama u svijetu. Zajednička pojava u mnogim zemljama svijeta jeste da je veoma teško postići to da političari na vlasti saslušaju mlade ljude koji pripadaju njihovim strankama, ili koji su okupljeni u nekoj nevladinoj organizaciji ili mlade ljude koji imaju dobre ideje uopšte.

Ono što je važno jeste da prvi put – ne nevladine organizacije, ne samo omladina, ne neka škola i ne univerzitet – već mladi političari ove zemlje iz 14 različitih političkih stranaka su se okupili oko ove platforme, radili zajedno i iznijeli vrlo realan prijedlog o tome na koji način bi se mogla riješiti pitanja mladih ljudi. Ovo je potpuno nova pojava. Koliko ja znam ovo je prvi puta da se ovako nešto desilo u ovoj državi. Moramo im dati našu podršku, te pozivam vas da ih podržite u njihovim nastojanjima. Ured visokog predstavnika će pripaziti na njih, međutim na njima je da učine dalje korake naprijed da uvjere, odnosno zahtijevaju od političara koji su na vlasti da podrže i sprovedu ovu platformu.

Hvala vam.